

四庫全書

史部

欽定四庫全書

明儒言行錄卷四

安化縣知縣沈佳撰

王恕介菴先生端毅公

字宗貫陝西三原人正統戊辰進士仕至吏部尚書

改翰林院庶吉士翰林業治古文辭而恕不喜為古文辭務期以明體適用本之經術博極經濟以是不得留

出為大理評事知揚州府屢辨疑獄歲饑發廩不待報且給醫藥多所全活作資政書院教羣弟子天順四年以考最遷江西右布政使轉河南布政時以襄南地多山險秦楚之流民萃焉日出剽掠於是特設治院以先生為右副都御史領之撫治南陽諸府南陽豪爭礦殺人公獲其渠魁餘悉解散以內艱去會襄陽盜起詔公起復會兵搗其巢走之及劉千斤輩作亂公亦會王師平之大帥欲縱兵搜山公不可下令曰擅殺者斬復榜

示流民諭使復業民為復生祠繪像事之

李東陽撰
神道碑

母憂歸起復巡撫河南轉南京刑部左侍郎父服闋起
刑部左侍郎治漕河改南京戶部左侍郎雲南夷獠為
梗改公左副都御史巡撫其地時鎮守內臣私市外夷
誅求無厭人莫敢問公單車攜二童往廉得中貴人錢
能使其下指揮郭景私通安南王黎灝得異寶生金等
物公遣騎道執景迫投井死因没入其賄飛章露劾能
私通外夷罪當死且勸上不寶異物凡花木禽獸寶玩

宜一切拒絕又言時交趾以鎮守非人致一方陷沒騰
衝起釁致巖川遂叛今日之事殆又甚焉上遂徹能還
安置南京在雲南九閱月疏二十上由是直聲動天下
進右都御史召掌南京都察院事往返書衣一橐而已
已遷南兵部尚書參贊南京守備如故盡攝營將之占
役者一卒不得走私門番使過龍江驛嚴禁織作工賈
非奉旨毋得自為互市考選軍政即同事者無敢干
尋以部銜兼左副都御史巡撫南直隸公以天下一切

納貢賦者苦收取過重至破家乞嚴禁革光祿寺歲供
白祭概及庖人賤工請稍裁省皆報可常州時有羨米
請以六萬石補常州之夏稅又以補諸府戶口鹽鈔六
百萬貫官田賦太重減耗米十餘萬明年水災奏免秋
糧數十萬草半之而周行賑貸其貧者至二百餘萬口
三吳之人以為自設巡撫以來獨公與周文襄忱兩人
而已忱以十八年公不二年其久與暫不相當然忱仿
彿姚元之公則賢於宋璟矣

公報災傷因言織造進貢勞民傷財奏略云古之聖帝
明王愛民如子撫摩安輯務俾得其所彼投珠抵璧却
千里馬焚雉頭裘者非不知珍玩之可愛也恐因而妨政
害事所以投之抵之却之焚之以固結人心為社稷計
也乞崇恭儉為天下先非特織造可以寢罷凡百冗費
俱宜樽節一應不急之務俱宜停止以息民力

端毅
奏議

中官杜福以中旨下常州取截江網及刻絲觀音羅漢
古迹公言帝王之學貴要典謨訓誥及無逸旅獒不之

取而取截江網者何也中官王敬乘傳東南搜索竒玩
所至驚懼公言當此凶歲謂宜遣使賑濟而乃橫索玩
好昔唐太宗遣使梁州諷李大亮獻名鷹明皇令益州
織半臂背子捍撥鏤牙大亮與蘇頲不奉詔臣敢不效
之又具言其失人心損國體傷和氣而召災沴三奏劾
之上乃詔戒敬久之敬等俱收捕下獄同惡王臣斬於
東市中外稱快以是益歸心於公

王鏊撰
墓銘

二十年復為南京兵部尚書參贊機務時錢能復黃緣

同守備南京與公共事公坦然不念前事能亦心服公
語人曰王公天人也吾惟有敬事而已加太子少保
刑部員外郎林俊疏論中貴人梁芳與妖僧繼曉比而
造大鎮國永昌寺忤旨下詔獄經歷張黻救之亦下獄
謫外公言京師祀天地僅一壇祖宗暨先聖僅一廟而
佛乃至千餘寺者舛也一寺立而移民居者且百家費
內帑者且數十萬人皆知此事之非宜而不言獨二人
志在盡忠而得罪恐人自此以言為諱設有姦邪誤國

誰復肯為朝廷言者上雖報聞而中不能無嫌以星變
遷俊黜官南京公凡應詔者二十一建白者二十九多
報可天下益服公之直至朝事有所不可必曰王公胡
不言則又曰公疏且至矣而公疏果至至為謠曰兩京
十二部獨有一王恕公卿大臣皆側目而上亦漸心厭
之最後所言政令失信尤中上諱詔落公太子少保致
仕去

公既歸名益高薦者無虛日孝廟即位召為吏部尚書

旋加太子太保公在吏部裁抑僥倖褒獎名節甄拔淹
滯中貴無敢干以私劉吉在內閣每有所軒輊公亦不
屈守備蔣琮與南京科道相訐奏科道多得貶黜琮自
如公言宮中府中俱為一體陟罰減否不宜異同知州
劉概御史李興以忤劉吉下獄公力辯之得減死內旨
以通政司經歷為本司參議公言錄出自科目自可遠
而越次超陞恐非所以愛之也惟以天下之官待天下
之士勿以親戚妨公議事乃止時有建白多謂業已行

矣公言天下事設未得其當雖十易之不為害若謂已行無及則古之納諫如流豈皆未行乎公遇事輒言有不合即引疾求退上每溫詔留之執政有不悅謂其好名者

嘗為上言正統以來日止一朝臣下進見說事不過片時聖主雖聰明豈盡能識察不過寄聰明于左右左右之人與大臣相見者無幾又豈能盡識諸大臣之賢否亦不過寄聰明於門客門客識見未必盡合公論或得

之毀譽之口或出於好惡之私是故以直為枉以枉為直者多矣欲察識之得其真莫若日御便殿宣召諸大臣與之講論治道謀議政事以觀大臣之能明加甄別其不可者罷去而可者委任既任之矣勿因小嫌而沮其志勿以小過而挫其節將以計大事也則小嫌宜在所略將以決大疑也則小過宜在所容人言當卹挾仇讐而誹訾之者不可不察衆論可采執偏見而阻闕之者不可不辨機密之事賜以手詔激切之情許得面陳必

如朱熹所謂任則勿疑疑則勿任此聖君賢相所以誠
意交孚而共成正大光明之業者也書曰任賢不貳去
邪勿疑惟陛下大書座右時賜省覽又言陛下嗣位之
初人心歸向稱頌明聖者以抑奢侈裁奔競將內官輪
年遞降凡天下臣民所甚欲而不能革者一旦而盡革
之也此臣民所以愛戴而顙望以為太祖太宗之治且
復見於今日近臣病中乃風聞各監局內官陞進數多
不知即日前遞降者乎抑更用一番人也前既以為濫

而逃降之則今何獨不以為濫而逃陞之乎似非所以示天下信也上甚嚮納時南科道保恕宜入內閣而劾劉吉宜罷上曰朕用蹇義王直故事委恕吏部即謀議無不從何必內閣也在吏部抑僥倖獎名節拔淹滯人莫敢私干者薦彭韶張悅周經楊守陳為左右侍郎耿裕何喬新倪岳皆引置執政忠諫如王徽黃仲昭賀欽被抑如周瑛祁順並薦用皆豐芑數世所培植而為海內所注向者終弘治之世皆賴其用

上釋奠文廟先生請用太牢加幣從之先生重禮風義之士故一時後進在朝者如庶吉士胡智御史湯鼐主事李文祥十餘人皆慷慨喜事以先生為宗主先生侍經筵見上困於酷暑請暫輟講鼐即言天子方向學奈何阻其進恕請非是先生惶恐待罪謂諸臣責臣是也然諸臣求治太急見朝廷待臣太重故責臣太深欲臣盡取朝事更張之如宋司馬光母論臣不敢望光今亦豈熙豐時也上優詔答之己而鼐劾閣臣萬安劉吉尹

直安等皆免吉留使門客徐鵬魏璋伺籛得壽州知州
劉概書引夢牽牛事劾之籛概皆下獄欲以妖言坐之
先生力救事始解凡中官倖人恩澤過富者先生輒為
裁止雖上已許必固執不行

南給事周紘御史張曷閱南都軍數少以為皆中貴人
私占疏劾之與許奏出補外職公論救之兩廣都御史
秦紘糾總兵安遠侯柳景不法坐致仕去公言紘不當
罷卒奏起為戶部尚書有徐生者太醫諸醫也傳旨陞

院判公執奏下吏部同禮部太醫院同御藥房大監選
用公力爭祖宗來未有吏部會內官推選官員例上曰
徐生善藥與院判何傷會臺諫逢吉意劾巡撫及藩郡
官用內批斥遂公以不得其職疏屢上乞休上溫旨留
而內閣滋不悅時大學士丘濬不喜公每有論奏陰抑
之且使其私人太醫院判劉文泰許奏公亂選法又不
當令人作大司馬王公傳疏留中公疏自劾乃下文泰
獄謫官而言官亦交劾濬妨賢媚才公竟致仕去

又二歲濟卒文泰往弔其夫人叱之出曰汝構王公於我相公儉人也何弔為聞者快之

公歷仕四十五年家居健無恙日翫經書嘗言我垂老方理會學問而搢紳大夫過三原里者必屏呵從走謁再拜叩質疑難公亦應之不少倦

公年九十猶考論經史著述為書而一言一動必揆諸矩度

蔡虛齋曰公本治易尤熟于書詩公之德之才垂老而

不衰者其有得學問之力益信矣

嘗曰吾免承裕今年二十三已中舉然吾未欲其急於仕且令靜覽羣書間閱世務冀他日得實用耳

並虛齋集

公守揚時有德公者餽千金為壽公雖謝却之然亦未能忘情終夜不寐每念一動即大呼曰王某汝何得起此念如是者數四比明此念遂息

紀聞

九十歲天子遣行人存問又三年卒公暇食無數人至其日小減閉戶獨坐忽有聲若雷白氣瀰漫遂暝特進

左柱國贈太師謚端毅公有五子十三孫多賢而顯者而少子承裕有學行不墮其家聲學者稱平川先生

昂昂乎大河喬嶽之英落落乎拔地凌霄之器所學者聖賢必居之安而資之深所重者君親必俯不忤而仰不愧凜乎嚴霜勁鐵有定見有定守煥乎晴空白日好心事好心地力能敢言人不敢言敢為人不敢為身係宗祏之一安一危君子之一進一退其高標雅望足以鎮懾邪棼然之躁其義膽忠肝足以勵頑懦靡然之志

於戲此真聖明時之偉人正人天地間之英氣正氣

張元

頌贊

先生秉心迪行守古典禮不詠於勢利不暴於寡弱威略足以平寇亂廉貞足以激貪鄙仁惠足以蘇困窮公暇手不停批諸經百氏有得輒書疑者辨訛者訂發前賢所未發體之身驗之家而推之以輔治天下蔚為一代之望可謂有得者矣是以身任天下之重遇事敢諫皆闕社稷至計名教大經直指權奸而不忌力救正直而

無阿婉而不迫直而不譎頌而不諂真得伊周孔孟程

朱告君之遺意先生雖極人臣之位能折節下士與講

明道理故士之有志者咸樂及門而親炙之

程廷珙介
菴先生奏

議
序

王虎谷稱公憂天下之志如范希文濟天下之才如司

馬君實直諫如汲長孺惠愛如鄭子產

寶善
類編

公恭勤力學自始學筮仕至老每夜書燈達旦不息倦

則眠覺則誦讀日與士夫相接終日講說樂而忘倦

陝西

通志

巡撫河南不挈僮僕惟行竈一竹食籬一服無紗羅日
給惟猪肉一觔豆腐二塊菜一把醬醋皆取主家結狀
再無所供其告示云欲攜家僮隨行恐致子民嗟怨是
以不恤衰老單身自來意在潔己奉公豈肯縱人壞事
人皆傳誦其詞

端毅以都御史至京一見閣老以羊毛口袋為餽閣老
問之曰此物何為公曰可盛米二三十年

溼野集

為吏部時署於門曰宋人有言凡仕於朝者以餽遺及門為恥受任於外者以芑苴入都為恥今動輒曰贄儀而不羞於入我寧不自恥哉一時帖然無異議

南國漫錄

陳言聖學疏云帝王之學與韋布之學不同韋布之人多聞強記將以待聘故其學貴乎博帝王者身兼治教之責而為億兆之主故其學不在乎博在乎知其要夫經各有其要能知其要則足以盡博矣詩三百一言以蔽之曰思無邪經禮三百曲禮三千亦惟曰毋不敬而

己佛氏之慈悲老氏之清淨皆非治天下之道其餘妄誕之術非惟治天下不可用且以惑世誣民而為斯道之害尤非帝王所當留意者也儒者之書發明三綱五常之道修齊治平之理如布帛菽粟之在天地間有不可一日而無也然而諸儒論說紛紜簡編浩繁亦豈帝王所能徧觀而盡讀之惟於退朝清燕之時取書之二典三謨與夫太甲說命無逸旅獒諸篇而讀之復取漢唐書有關於治亂成敗者三二策而涉獵焉可以開廣

聖心有資化理大抵帝王之學非徒誦說文字講解訓
話而已要在學二帝三王之道身體而力行之建中建
極為百官之程式俾萬民之人安陛下誠能以堯舜禹
湯文武之心為心行堯舜禹湯文武之道是即堯舜也
即禹湯文武也夫何不可及之有昔孟子之論進賢也
必察之於國人而後用之其去邪也亦必察之於國人
而後去之今日進退人材必如此而後可不如是則君
子退而小人進矣又其論用刑也亦察之乎左右大夫

國人然後殺之今日之用刑亦必如此而後可不如此
刑必及於無辜矣諸葛武侯曰宮中府中俱為一體陟
罰減否不宜異同若有作奸犯科及為忠善者宜付有
司論其刑賞不宜偏私使內外異法也不然則同功異
賞同罪異法而人心不服矣凡此皆馭世之要道也陛
下誠專意於二帝三王之學是法是行而不為異端邪
術之所惑其進退人材與賞功罰罪必如孟子武侯之
言則陛下為堯舜之君而天下蒼生為堯舜之民而被

堯舜之澤不難矣

瑞毅公
奏議

公在南京崑山人有李元壽者工書嘗書諸經四書小本楷法精善公見而愛之呼為李生召使侍舟中無事輒令生琅誦大禹謨皋陶篇斂衽而聽之

在吏部少子承裕為舉人公令開門納客具得人才文武之概退叩所聞用多稱職有賢士大夫至部堂者延之後堂禮以賓禮命坐留茶人人謂公能傾心好賢也在留都時嘗出有狂夫向公騎呼萬歲公入部延咨僚

屬婁性曰昔張忠定行軍時有故事公曰止勿言待我自思比曉得數策還語性性皆不答因問當時忠定所以處者喟然嘆息謂古人之不可及家居作石渠意見取先儒傳註稍悖聖經者與諸生商訂可否務剗俗學以求合不傳之旨蓋晚又號石渠云意見者乃意度之見耳未敢自以為是也徧集歷代名臣諫議錄一百二十四卷先生年八十四而著意見八十六為拾遺八十八為補缺其髦而好學如此

先生之學大抵推之事為之際以得其心安者故隨地可以自見至於大本之所在或未之及也

黃氏曰關學大概宗薛氏三原又其別派也其門下多以氣節著風土之厚而又加之學問者也

石渠意見

戒慎恐懼二節 天理人欲相為消長有天理即無人欲有人欲即無天理如何前一段是天理之本然後一段是遏人欲於將萌

中和節 中和乃人性情之德雖有動靜之殊初非二物戒懼謹獨皆是不敢忽之意豈有彼此如何自戒懼而約之止能致中自謹獨而精之止能致和如何致中獨能位天地致和獨能育萬物恐非子思之意

誠者自成章 誠實也人之心無不實乃能自成其身而道之在我者自無不行矣註以誠與道對言以人與物為二事非也 物之終始之物猶事也人之誠實者作事自然有始有終不誠實者則雖有所為始勤終怠

所以成不得事故曰不誠無物

饑渴章 人能以饑渴貧賤動其心則大本立而過人遠矣其他小事末節雖不及人不為憂矣

孟子卒章 無有乎爾者是反說之辭猶言豈無有也孟子之意以為孔門弟子速肖者七十二人豈無有見而知之者既有見而知之者則今日豈無有聞而知之者觀於此言則孟子隱然以聞知自任也

佳按先生取經書傳註有所疑滯再三體認以己意

推之名曰石渠意見大略與門人商訂之言而不敢
遽以為是蓋其垂老猶孳孳力學與後儒稍有所見
而即肆為誕悖者異矣

王承裕平川先生康僖公

字天宇端毅公季子弘治癸丑進士仕至南京戶
部尚書

授兵科給事中遷吏掌科逆瑾恨其遠已又疏進君子
退小人益恨之罰粟輸邊以外艱去瑾誅起原官歷太

僕少卿正卿南太常卿宸濠反發留都之為內應者嘉
靖初遷戶部右侍郎晉南戶部尚書致仕林居十年戊
戌五月卒年七十四謚康僖

十四五時從莆田蕭某學蕭令侍立三日一無所授先
生歸告端毅曰蕭先生待某如此豈以某為不足教耶
端毅曰是即教真汝師矣

登第後侍端毅歸講學於弘道書院弟子至不能容冠
婚喪祭必率禮而行三原士風民俗為之一變馮少墟

以為先生之學皆本之家庭者也

馬理谿田先生

字伯循陝西三原人正德甲戌進士仕至光祿寺

卿

幼敏慧醇雅如成人年十四為邑諸生研究五經旨義
弘治癸丑王端毅公致仕康僖公以進士侍歸講學於
弘道書院先生授其學一切體驗於身心與同門秦偉
共為反身循理之學以曾子三省顏子四勿為約進退

容止力追古道康僖深器之

游太學與呂柟崔銑諸公交相切劘文章德業名震都

下

授吏部稽勲主事改文選與郎中不合引疾歸居三年
復仕與黃鞏等諫南巡被杖未幾復歸授徒講業乃設
教於武安王祠藩臬為建嗟峨精舍以居生徒嘉靖三
年復薦起率同官伏闕爭大禮被杖復職歷考功郎中
丙辰考察外官內閣冢宰各挾私忿欲去廣東提學魏

校河南學政蕭鳴鳳陝西提學唐龍先生曰三人者有
數人物若欲去之請先去理由是獲免既考察京官有
附勢三人輒首黜之人稱為真考功分考會闈所取皆
海內名士丁亥遷南通政復謝病歸辛酉薦起光祿寺
卿復謝病辛丑又薦起南光祿亡何引年致仕隱於商
山書院又十年卒年八十二

先生居常言身可絀道不可絀行可則任惟孔子能之
下此惟當守經以故屢進屢退自其筮仕以致謝政無

日不從事學問其學一以窮理居敬為主四方學徒轉相授受自搢紳士子以至田夫野叟無不欣慕之雖四裔亦聞其名安南貢使至問曰遠聞馬道學名所願一見今何不在任列高麗使至亦問馬主事為聖朝第一人宜加厚遇乞頒賜所為文使國人矜式其見重如此嘉靖乙卯十二月十二日關中地大震而先生以是夜卒先是嘗謂薛應旂曰值明夷之象為天地之否吾其不免先生善學易兼知數云學者稱為谿田先生隆慶

二年贈右副都御史賜祭葬追謚文莊所著有四書註
疏周易贊義尚書疏義詩經刪義周禮註解春秋修義
及詩文集陝西通志行世

登第時以大學衍義為問先生對曰大學之書凡堯舜
禹湯文武之道也傳有克明峻德湯之盤銘堯舜帥天
下以仁之語真氏所衍漢唐宋之事非大學本旨也真
氏所衍止於齊家不知治國平天下皆本於慎獨工夫
宋儒所造大率未精以此失問者之意故欲填首甲而

降之

先生特好古禮儀時自習其節度至冠婚喪祭禮則取
司馬溫公朱文公與大明集禮用之居父喪與嫡生母
之喪闕中傳以為訓而於進退出處持節尤高陞南道
政過河池驛見其丞貌類黃伯固問之乃其弟叔開也
時伯固已死先生泣然泣下作詩贈之云六年復見先
生面為過河池見叔開

先生師事王康僖又得涇野後渠以為之友墨守主敬

窮理之傳嘗謂見可行之仕惟孔子可以當之學聖人者當自量力故每出不一二年即歸歸必十數年而後起綽綽然于進退之間後渠稱其愛道甚於愛官真不

虛也

學案

卓彼馬光祿聲望高山斗弱冠崇理學平川稱畏友立朝無多日強半在畎畝富貴與功名視之如敝帚垂老學

逾虛一步不肯苟吁嗟如先生百代名難朽

馮少墟關中四先生

詠

呂柟涇野先生文簡公

字仲木陝西高陵人正德戊辰進士仕至南禮部

右侍郎

公資性穎悟始就傳習幼儀即中高選奇之曰此大器也少即志聖賢之學危坐莊誦祁寒酷暑不越戶樞已受學孫行人昂充然有得為提學揚一清王雲鳳所知既舉鄉貢就業大學與三原馬伯循秦世觀榆次寇子惇安陽張仲修崔仲鳧林縣馬敬臣輟舉業而講理學

習古冠婚士相見禮孫行人歿為之服衰拜送弔客

續藏

邑人高朝用為戶部郎時過簡討王九思曰吾邑有顏
子子知之乎孝廟賓天諸生哭臨具禮耳公獨大哭出
涕羣衆指目為迂正德三年舉會試廷對第一知者皆
愕然歡喜曰此真狀元矣劉瑾以鄉人致賀公峻却之
任修撰翰林二年操介清苦門絕遺餽西夏搆亂公請
上入宮御經筵親政事庶禍本潛消宗社可保瑾惡其

言因夙不通問欲中以禍引疾歸瑾使校尉尾之至真定無所得返公在翰林與何瑭最善至是相繼去

杜門力田養親若將終身焉父或因小失責次子梓公跪而同受責父怒旋解

瑾誅薦起舊職上勤學疏謂文王緝熙敬止咸和萬民斯享臺沼之樂元順帝廢學縱欲太祖一舉而取之可為深戒或讓其過直公曰昔賈山借秦為喻文帝尚能用之况主上資度遠過漢文乾清宮災應詔言六事其

一曰逐日臨朝聽政其二曰還處宮寢預圖儲貳其三
曰郊社禘嘗欽承祇肅其四曰日朝兩宮承顏順志其
五曰遣去義子番僧邊軍其六曰取回天下鎮守內臣
又累疏勸上舉直錯枉不報復引疾歸歸值父病晝夜
視湯藥步履不能聲既一年鬚髯盡斑父卒痛哭嘔血
葬時雨甚徒跣擗踊蹈泥濘中道路環觀有泣下者
葬已廬中門外旦夕哭其居喪時自成服奠葬以至祥
禫斟酌損益各有儀注公自少窘匱及貴前後居家十

年讀書守道一無所營鎮守太監廖鎧賻以金幣立却
之客有托交游以三百金求書者公峻拒之曰人心如
青天白日奈何以禽獸相視也客慚而退服闋當道交
薦值世宗即位起入史館纂修武宗實錄上御經筵當
進講適仁祖淳皇后忌辰口奏宜存黻服之禮罷酒饌
之賜朝論避之復疏請尋溫聖學以為新政之助必克
己慎獨上對天心親賢遠讒下通衆志大禮議起意見
與時不合亡何奉詔修省復以十三事上言自劾皆格

心責難之論上曰此大臣宰相職枓忤慢乃引為己咎
下獄考訊尋謫解州判官會解守卒攝州事恤焚獨減
丁役勸農桑築隄以護鹽池開渠以興水利講讀教令
行呂氏鄉約及文公家禮察孝弟節義者標題其門求
子夏後訓諸學宮建司馬溫公祠正首陽夷齊墓訂雲
長闕公集迎其母躬孝養為百姓先遠方學者日衆擇
民間俊秀子弟習小學之節歌風雅之詩川中道不拾
遺行不相忤居三年御史盧煥等累薦稱其為王佐才

陞南吏部考功郎中瀕行士民接踵跪送哭聲震野既
渡河干猶聞不絕相與立祠生祀之尋擢南尚寶卿吳
楚東南士來受業者冠履錯沓時張相國應詔道出南
都有醜禮為賀者公托以官卑俸薄拒之陞南太常少
卿太廟災上疏乞罷不許

乙未陞國子祭酒躬行率人勤於訓迪每有條約動遵
古誼貴游子弟稍不率者即繩之以法有以敷教在寬
規者對曰寬非縱肆乃日刮月削而不責效于旦暮間

云耳然曰敬敷則曷嘗不嚴古稱師嚴道尊道尊而民敬學今人材不古內則祭酒外則提學率多因循姑息而不知人才日下公立教皆躬行以率之以正心修身忠君孝親為本間取禮儀及為詩樂圖譜令諸生講肄疾者問而醫之喪者弔賻之死者哭而歸其櫬德行著稱者揭於教榜核實獎之一切請託斬絕不行又言之吏部謫一監丞兩廳六堂諸屬罔不清慎奏減厯日以通淹滯申飭監規五事請之上皆報可人稱自宋陳吳

章四祭酒以師道自立者呂先生也御史張景薦公德
行文章可謂一代碩儒當今師表擢南禮部右侍郎上
欲視山陵于承天屢疏勸止不報既以表賀聖節赴京
值奉天殿災上疏乞休許之

公立身與人仁信自將為禮部侍郎時霍韜為尚書故
與夏言相惡嘗榜言過於衢公諷韜曰此告於天子者
公以語路人可乎言談韜短公曰公位宰相容天下之
賢何所不可夏霍雖不相能賴公稍解然夏疑公黨霍

霍亦疑公黨夏公終不白較嘗過府太守太守子讀書樓上太守令止之曰恐傷氣當微誦既戒左右時進食扶掖之上下公謂太守曰公愛子至矣願推此心以安百姓又過一府太守餞之郊席近養濟院公送饌院中曰以公佳肴共之無告

同諸公鄉謁孝陵衆將著緋公曰望墓生哀宜青衣角帶衆從之署吏部薦文武士可備將相之選者數人寮長霍走簡敘祭張故相公峻拒且云一變而為正人有

何不可其亢直敢言如此

公凝厚方面濶輔微鬚輪耳海口兩目炯炯有光雖官
三品履任達三十餘年座止圖書室無媵妾家無長物
平生不以私事干人亦不受人私干端嚴恪毅門人從
之數十年未嘗見其偷語惰容所在四方士就而問學
公教之以誠寧近毋遠寧粗毋精自日用情變倫教物
理推而遠之天道皇王之大一以身體力行為宗御史
有劾湛若水偽學者公曰聖王在上賢宰相在下豈可

使明時有偽學之禁問王守仁之學公曰講其學而行
非勿信可也不講其學而行是信之可也又曰學而行
之講知行之不合無損也學而不行講知行之合無益
也問朱陸之學公曰初時同法堯舜同師孔孟雖入門
路徑微有不同而究竟本原其致一也

在官次父書至再拜使者受而跪讀之其他親友有書
受讀亦各有儀聞期功喪必為位哭真壬寅七月朔卒
年六十四卒之夕有大星隕華陰高陵人為之罷市四

方及解梁門人聞者皆為位而哭訃聞上為輟朝賜論祭謚文簡陝西提學謝少南與郡守李文昇祀之正學書院海內人士無論識不識皆曰闕西夫子呂仲木所著有四書因問易說翼書說要詩說序春秋說志禮問內外篇史約小學釋寒暑經圖解史館獻納宋四子抄釋南省奏稿涇野詩文集

何喬遠曰懷慶安陽崑山高陵進賢三原武城嘉靖間稱篤行君子而高陵粹然矣溪田馬理曰呂先生之學

醇如許文正而著述惟盛貞如薛文清而知新則多

文簡一日與諸生講畢復言曰今日聚講不覺於舜顏
發得過多講時初非此意但好善之心自不容已纔說

者舜顏此心就覺濶大故言詞重複

寶善編

公所學醇正不以王陽明為是陳白沙為高其曰所謂
格物者隨時隨處格如伏羲亦嘗觀鳥獸之文但遠取
諸物必近取諸身若離却己身格做甚又謂白沙輩論
樂只在推開事去為樂克其流弊便是晉人之風則志

端識正可概見矣

世宗
寶錄

公事君行己皆兼古人之道始終不渝經書子史博讀
詳玩並有發揮門人環向請益耳聽口授無倦容無擇
言

馮少墟從吾曰涇野先生平日教人惟以甘貧改過為
言或者疑其淺余曰先生之學蓋得之顏子者也簞瓢
陋巷不改其樂非甘貧乎有不善未嘗不知知之未嘗
復行非改過乎故曰屢空曰不貳過聖賢之學大抵如

此以此而疑其淺也則佛老深矣

疑思錄

又曰涇野先生教人於動處求靜真得夫子告顏淵非

禮勿視聽言動意

少墟訂士編

又曰涇野先生海內學者所宗為山斗語錄所載言言

皆自躬行心得中流出最透悟最精實真可與西銘正

蒙並傳不朽者其有功斯道不淺

少墟撰先生語錄序

高景逸曰薛文清呂涇野二先生語錄中無甚透悟語

後人或淺視之豈知其大正在此他自幼未嘗一毫有

深只平平常常脚踏實地做去徹始徹終無一差錯既

不迷何必言悟耶

高子遺書

涇野訪蔡石岡蔡送至郊外別墅有盤餐曰此自己之饌爾非可以奉客公曰公亦尚有人己之分乎蔡不覺

大笑

涇野集

公與鄒謙之康德涵交鄒論學輒相關康流連聲伎志調不同而往來厚善沒身無間

嘗曰學道之名亦不消畏避人知纔有避人知的心便

是與好名之心相近

游雷震而群陰解君子恐懼修省而衆欲退皆以震自

治也

易說

王浚川廷相曰士惟篤行可以振化矣士惟實學可以經世矣曲德細操兢兢有執非不可以自美也以之動物則微研究載籍師守章句非不學於古訓也以之敷治則淺何也行非敦化而學靡達術皆遠於道故耳余取友於天下得有道者二人焉河內何粹夫高陵呂仲

木是也彼二子者篤契往哲幾於聖軌求諸今之世蓋
絕無而僅有者也觀其忠君孝親從兄信友儀刑于妻
子卓卓乎世之儀表又能率履貞淳游心澹泊非其道
義雖世所華重若塵垢我若殘賊我若辱蟻我者甘貧
守道老而彌固所謂萬物不奸其志天下不易其樂者
是矣不亦古人之篤行乎其學之造詣通極天人言論
風旨希夷瑩徹時而羣疑方構機宜未審乃能據經體
聖檢括參合獨斷內凝與道無爽所謂出入經術動中

幾會是矣不亦古人之實學乎嗟乎夫欲興治必以彌
綸之業付諸大賢當今之世舍二子其誰哉顧乃粹夫
高卧丘林與世淪棄仲木浮沈散秩時權未由方今聖
明當宁求賢如渴而二子者乃落落不偶豈晏嬰之智
不知仲尼在人者有未盡合歟抑上天之意拂而逆之
將使大受輔堯舜於晚節歟天之意不可知而人事每
會其塞此有識者之所以切慨也嗟乎賢之知不知責
在人者也治之成不成責在天者也二子則遯世無悶

矣天下將奈何仲木為南京尚寶卿三年將奏最於天
官氏諸門下生徵予言以贈其師乃舉仲木繫天下之
望告之若夫尚寶之績則固不俟於言矣

涇野先生尚
寶考續序

先生師事薛思菴所至講學未第時即與崔仲鳧講于
寶邛寺正德末家居築東郭別墅以會四方學者別墅
不能容又築東林書屋鎮守廖奄張甚其使者過高陵
必誠之曰呂公在汝不得作過也九載南都與湛甘泉
鄒東廓共主講席東南學者盡出其門嘗道上黨隱士

仇欄遮道問學有梓人張提聞先生講自悟其非曾妄
取人物追還主者先生因為詩曰豈有仁夫能過化雄
山村裏似當時朝鮮國聞先生名奏請其文為式國中
先生之學以格物為窮理及先知而後行皆恪守成法
而先所謂窮理不是泛常不切於身只在語默作止處
驗之所謂知者即從聞見之知以通德性之知但事事
不放過耳其工夫明白切實如此

涇野先生語錄

問靜時體認天理易動時體認天理難故君子存靜之體認者以達乎動之泛應者則靜亦定動亦定其能成德孰禦焉曰動時體認天理猶有持循處靜却甚難能於靜則於動沛然矣

問交友居家處世不能皆得善人甚難處先生曰此須有憐憫之心方好能憐憫便會區處如妻妾之愚兄弟之不肖不可謂他不是也此仁知合一之道

問今之講學多有不同者如何曰不同乃所以講學既

同矣又安用講耶

先生聞學者往來權貴門下乃曰人但伺候權倖之門便是喪其所守是以教人自甘貧做工夫立定脚根自不移

先生曰陳白沙徵到京吏部尚書問曰貴省官如何與天下省官同請對坐即坐無辭此儘朴實有所養羅一峰訪康齋見起御聘牌坊乃謂其子云不必有牌坊不見康齋而退此羅公高處康齋孔門之原憲而又有此

乎

先生曰昔者聞有一僉事求見王慙菴云西來一件為
黃河二件為華山三件為見先生王公云若做官不好
縱見此三者亦不濟事這般高不受人諂

大器問動靜不失其時曰正仕止久速各當其可汝今
且只於語默作止處驗也

黃惟因問白沙在山中十年作何事先生曰用功不必
山林市朝也做得昔終南僧用功三十年儘禪定也有

僧曰汝習靜久矣同去長安柳街一行及到見了妖麗之物粉白黛綠心遂動了一旦廢了前三十年工夫可見亦要于繁華波蕩中學故於動處用功佛家謂之消磨吾儒謂之克治

問聞見之知非德性之知先生曰大舜聞一善言見一善行沛然莫之能禦豈不是見聞豈不是德性然則張子何以言不梏於見聞曰吾之知本是良的然被私欲遮蔽了必賴見聞開拓師友夾持而后可雖生知如

伏羲亦必仰觀俯察

問樂在其中與不改其樂樂字有淺深否先生曰汝不
要管他淺深今日只求自家一箇樂耳曰然求之有道
乎先生曰各人揀自己所累處一切盡除去則自然心
廣體胖然所謂累處者不必皆是聲色貨利粗惡的只
於寫字做詩凡嗜好一邊皆是程子曰書札於儒者事
最近然一向好着亦是喪志可見

人動靜從容言語安詳不惟天理合當如此且起觀者

敬愛就是學問也學者不可無此氣象但須要先有諸中耳

問收放心在何處先生曰須于放的處去收則不遠而復矣

我欲仁斯仁至矣今講學甚高遠某與諸生相約從下學做起要隨處見道理事父母這道理待兄弟妻子這道理待奴僕這道理可以質鬼神可以對日月可以開來學皆自切實處做來

問講良知者如何先生曰聖人教人每因人變化如顏淵問仁夫子告以克己復禮仲弓則告以敬恕樊遲則告以居處恭執事敬與人忠蓋隨人之資質學力所到而進之未嘗規規于一方也世之儒者誨人往往不論其資稟造詣刻數字以必人之從不亦偏乎

陽明本孟子良知之說提掇教人非不警切但孟子便兼良能言之且人之知行自有先後必先知而後行不可一偏傳說曰非知之艱聖賢亦未嘗即以知為行也

學者只隱顯窮達始終不變方好今之人對顯明廣衆之前一人焉閒居獨處之時又一人焉對富貴又一人焉貧賤又一人焉眼底交遊所不變者惟何粹夫乎學者到怠惰放肆總是不仁仁則自是不息

詩人從周公步履上看便見得周公之聖故曰赤烏几几凡人內不足者或有譏謗之言步履必至錯亂不能安詳故古人只求諸己在己者定外邊許大得失禍福皆不足動我是故烈風雷雨弗迷

問慎獨工夫曰此只在于心上做如心有偏處如好欲處如好勝處但凡念慮不在天理處人不能知而已所獨知此處當要知謹自省即便克去若從此漸漸積累至於極處自能勃然上進雖博厚高明皆自此積

東郭子曰我初與陽明先生講格物致知亦不肯信後來自家將論孟學庸之言各相比擬過來然後方信陽明之言先生曰君初不信陽明後將聖人之言比擬過方信此却喚做甚麼莫不是窮理否東郭子笑而不對

呂潛問欲根在心何法可以一時拔得去先生曰這也
難說一時要拔去得須要積久工夫才得就且聖如孔
子猶且十五志學必至三十方能立前此不免小出入
時有之學者今日且于一言一行差處心中即便檢制
不可復使這等如或他日又有一言一行差處心中即
又便如是檢制此等處人皆不知己獨知之檢制不復
萌便是慎獨工夫積久熟後動靜自與理俱而人欲不
覺自消以一時一念的工夫望病根盡去却難也

問聖學工夫如何下手先生曰亦只在下學做去

問戒慎恐懼是靜存慎獨是動察否先生曰只是一個工夫靜所以主動動所以合靜不暗不聞靜矣而戒慎恐懼便惺惺此便屬動了如大易閑邪存其誠一般邪閑則誠便存故存養省察工夫只是一箇更分不得

章詔問格物先生曰這個物正如孟子云萬物皆備於我物字一般非是泛然不切于身的故几身之所到事之所接念慮之所起皆是物皆是要格的蓋無一處非

物其功無一時可止息得的聶斯曰某夜睡來有所想像念頭便覺萌動此處亦有物可格否先生曰怎麼無物可格君子無終食之間違仁造次必於是顛沛必於是亦皆是格物

先生曰聖賢每每說性命來諸生看還是一箇是兩箇章詔曰自天賦與為命自人稟受為性先生曰此正是易一陰一陽之謂道一般子思說自天命便謂之性還只是一箇朱子謂氣以成形而理亦賦焉還未盡善天

與人以陰陽五行之氣理便在裡面了說箇亦字不得
陳德文因問夫子說性相近處是兼氣質說否先生曰
說兼亦不是却是兩箇了夫子此語與子思原是一般夫
子說性原來是善的本相近但後來加着習染便遠了
子思說性原是打命上來的須臾離了便不是但子思
是恐人不識性的來歷故原之於初夫子因人墮於習
染了故究之於後

橫渠云糟粕煨燼無非教也他把這極粗處都看做天

地教人意思此理殊可觀

人之喜怒哀樂却是天之二氣五行亦只是打天命之性上来的但仁義禮智隱於無形而喜怒哀樂顯於有象且切緊好下手做工夫耳學者誠能養得此中了即當喜時體察這喜心不使或流怒時體察這怒心不使或暴哀樂亦然則工夫無一毫滲漏而發無不中節仁義禮智亦自在是矣

問近日多人事或恐發學先生曰這便可就在人事上

學今人把事做事學做學分作兩樣看了須是即事即學即學即事方見心事合一體用一源的道理父母生身最難須將聖人言行一一體貼在身上將此身換做一個聖賢的肢體方是孝順故今置身於禮樂規矩之中者是不負父母生身之意也

諸君求仁須要見得天地萬物皆與我同一氣一草木不得其所此心亦不安始得須者伊尹謂一夫不獲若已推而內之溝中是甚麼樣心思只是此心用不熟

工夫只在積累隨事皆存此心數年後自覺得有天地萬物為一體氣象

人能反己則四通八達皆坦途也若常以責人為心則舉足皆荆棘也問無事時心清有事時心却不清曰此是心作主不定故厭事也如事不得已亦要理會

教汝輩學禮猶隄防之於水若無禮以隄防其身則滿腔一團私意縱橫四出矣

問羅整菴譏象山只論心不及性呂涇野曰只論心論

性不論行亦未是須着自家行去方好象山謂六經皆我註脚如這等議儘是高明的但却未曾如此行爾如與諸子爭辨便忿恨不平甚至罵詈躬行君子豈是如此夫子自謂吾志在春秋行在孝經予謂夫子之神在論語乎

涇野因講仲尼祖述堯舜處謂諸生曰看孔子的學問是何等樣大酌古準今參天兩地這便是聖人的學問若賢人的學問便下聖人一等了

問夫子之得邦家如何先生曰看來不疾而速不行而至只是一易曰鼓舞之謂神其機在用人上蓋其所舉用者如顏曾冉閔如子產伯玉季札之輩皆登庸之矣蓋人明到極處就是神了如水之清徹其底砂石毫髮無邀如鏡之明妍媸一過盡照了

問學孔子自何人始先生曰自顏子始學顏子自何人始曰自程伯淳始學伯淳自何人始曰自尹彥明始故知孔子者莫如顏子知程子者莫如尹子

涇野謂曾子易簣的去處真是歿壽貳他不得的或語及尹和靖出處進退甚是分明曰彥明曾亦應過進士舉來策問中有議誅元祐黨人即嘆曰是尚可以干祿乎哉遂不對而出看和靖這出處去易簣事亦不遠了人之身只有箇出處進退死生壽歿而已學者做工夫過得此等關餘處皆易矣

得聖門之正傳者尹子而已其行慤而直其言簡而易先儒謂周茂叔令程子尋顏子之樂處所樂何事伊川

只答或人云若說有道可樂便不是顏子此語極好夫
顏子心胸何等宏大何等灑落視世之富貴貧賤利害
死壽俱無足以動其中者此誠見大心泰無不足也顏
子之樂處正在於此

問不遷不貳如何曰不遷怒發而中節之和不貳過幾
於喜怒哀樂未發之中顏子逐日在這性情上用功怎
麼不謂之好學又問何以見得性情曰七情之中惟怒
為甚怒而不遷則凡七情皆得其正矣人性至善本無過

失過而不貳則馴致於至善矣

顏子能聽受聖人之教如墾熟田土受時雨故語之而不惰學者只至於不惰甚難今學但聞說及道便思睡了緣無領受之地爾只是一片硤确生田地雖有雨亦流轉去不停矣

問一貫忠恕忠是一恕是貫先生曰此殊支離曾子平曰教門人惟在忠恕上用功故因門人之問則言所謂一貫即我前說的忠恕便是一時間就指出點化門人

這處便見曾子已得了一貫了

佳按涇野先生此言何等直截便見先生已通悟透

徹

問曾子臨終而啓手足見得他平日未嘗失手足於人若止是形體則世之保首領以沒者亦多矣先生曰然曾子一出言未嘗忘父母一舉足而不敢忘孝自云戰戰兢兢不知用了多少工夫來故孟子謂守身事親今之為宦者無見於此而傷人害物無所不至故人至痛

詈有傷及祖父者皆是辱親不孝之大者故孝子必敬
其身者懼辱親也

問任重何以要弘道遠何以要毅先生曰天下之老皆
為吾老天下之幼皆為吾幼心胸何等大著故程子謂
西銘言弘之道心便如此弘了而私意少有間息便是
不毅觀曾子臨終他人救死不暇心中不安雖一簣之
微亦必易之者他是何等毅仁以為己任死而後已此
曾子所以能踐形惟肖乎

古人心胸如天之無不覆如地之無不載然其工夫又不間斷如曾子只是弘毅弘便能任重毅便能致遠學者當學曾子

呂潛

字時見號愧軒涇陽人

師事呂涇野一言一動咸以為法舉嘉靖丙午鄉書卒業成均時朝紳有講會先生於其間稱眉目焉母病革欲識其婦面命之娶先生娶而不婚三年喪畢然後就

室父應祥禮科都給事中既卒而封事不存先生走闕
下錄其原稿請銘於馬文莊與郭蒙泉講學谷口洞中
從學者甚衆涇野之傳海內推之薦授國子監學正舉
行涇野祭酒時學約調工部司務萬厯戊寅卒年六十

二

郭郭

字維藩號蒙泉涇陽人

嘉靖戊午舉於鄉選獲嘉教諭轉國子助教陞戶部主

事出守馬湖年八十八先生與愧軒同學愧軒之父其師也辛酉計偕因呂師會葬遂不行有古師弟之風其學以持敬為主自少至老一步不敢屑越嘗有詩云學道全憑敬作箴須臾離敬道難尋常從獨木橋邊過惟願無忘此際心又云近名終喪已無欲自通神識遠乾坤濶心空意見新閉門只靜坐自是出風塵學者稱蒙泉先生

初守馬湖俗陋易囂公恩威並濟居未三載聞有從子

之戚念伯兄且老獨居遂投牒歸歸田二十餘年自讀
書講學外他無所事督學許孚遠雅重之

公器宇凝重篤于倫理暇中喜吟詩卓有堯夫擊壤遺

意門人以其德私相謚曰貞懿

陝西通志

王之士秦闕先生

字欲立陝西藍田人萬厯中薦舉

嘉靖戊午舉於鄉既而屏棄帖括潛心理學作養心圖
定氣說書之座右閉關不出者九年蒿床糲食尚友千

古以為藍田風俗之美由於呂氏今其鄉約具在乃為
十二會赴會者百餘人設科勸糾身先不倦諸灑掃應
對冠婚喪祭禮久廢每率諸弟子一一敦行之美俗復
興又謂天下之學術不一非親證之不能得其大同於
是赴都門講會與諸老先生相問難上闕里謁先師廟
墓低徊久之南行入江右見章本清漢鄧潛谷元錫揚止
菴闕浮浙水而下至吳興問許敬菴學者聞先生至亦
多從之萬曆庚寅卒于家年六十二祭酒趙用賢疏薦

詔授國子博士除目下而先生不及見矣先生行己必
恭與人必敬一時感慕執經者履滿戶外著有理學緒
言信學私言大易圖象卷學道考源錄易傳詩傳正世
要言正俗鄉約王氏族譜正學筌蹄闕里瞻思關洛集

等行世

陝西志

楊鼎莊敏公

字宗器陝西咸寧人正統乙未進士仕至戶部尚

書

家貧好學手不釋卷宣德乙酉鄉舉第一明年會試下第時南監祭酒陳公敬宗學行動朝野乃上疏請入南監就教上從之比至監清苦力學修行陳公試其文察其行歎曰閉戶端居甘人所苦雖簞瓢不是過也

舉會試第一擢廷試第二在翰林迥然自異累陞戶部尚書中官牛玉諭旨欲折江南糧銀實內帑以他物充武職俸公執奏乃已延綏用兵欲預征邊餉公言黃河漢唐漕運故道雖稍險然三門而上小河可達延綏者

尚在貯糧水次湖流徐運何所不濟疏上且請身督之

沮于議不果

陝西通志

嘗書十思於坐隅以自省曰量思寬犯思忍勞思先功
思讓坐思下行思後名思晦位思卑守思修退思早未
幾加太子少保致仕卒年七十六贈太子太保謚莊敏
公天性直諒見事明決確然有守死生禍福舉不足以
動其心居家冠婚祠祀遵用古禮築靜善書院延師以
教里中子弟歲飢悉出所蓄以賑親舊嘗語諸子曰吾

平生無可取者但識廉恥二字耳因自號恥菴又言吾
學問得之南雍為多著有助費稿二十卷及奏議五卷
行於世

韓邦奇苑洛先生恭簡公

字汝節陝西朝邑人正德戊辰進士仕至南兵部
尚書

公性剛直尚節概初舉進士值劉瑾亂政朝士奪氣同
年多往謁有約公者卒不往為時所重

授吏部考功主事轉員外郎辛未考察都御史袖私帙視之先生奪去曰考覆公事有公籍在都御史為之遂謝調文選京師地震上疏論時政缺失謫平陽通判甲戌遷浙江僉事分巡杭嚴獨持風裁凡鎮守并織造中官有所求率裁抑之宸濠將謀反遣內豎飯僧於天竺寺聚者數千人先生防其不測立散遣之又以儀賓進貢假道衢州先生不可曰貢使自當沿江而下奚俟假道於是襲浙之計窮尋因富陽縣產茶與鱒魚進貢採

取時民不勝其擾公目擊其患作歌以諷鎮守中官誣
奏公怨謗阻絕進貢逮至京下錦衣獄褫其官

陳敬亭
杭州府

志

公初被逮時杭府縣贈錦衣官校金祈途中寬梃公斥
之曰死則死耳何以金為及府縣贈公路費公揮却之

沂陽
日記

世宗即位起山東參議乞休甲申大同兵變起山西左
參政分守大同先生單車入城人心始安巡撫蔡天祐

至代州先生戎服謁見天祐驚曰公何為如此曰大同
變後巡撫之威削甚今大同但知有某某降禮從事者
使人知巡撫之不可輕也朝廷復遣胡瓚以總督出師
時首惡業已正法而瓚再索不已先生止之不聽城中
復變久之乃定先生亦致仕去先是公弟邦靖亦以是
官威行惠懷甚得士民心公既下雁門士民父老圍告
曰先使君之治誠善願使君守而勿失感慕咨嗟有泣
下者後公所行一無改於舊民甚安之

王九思
撰傳

戊子起四川學副改右春坊右庶子兼翰林院修撰其
秋主試順天以錄序引用經語差誤左遷南太僕寺丞
再疏歸尋起山東副使大理左少卿以左僉都御史巡
撫宣府入佐院事又出巡撫山西政益嚴肅守益儉朴
間日以廩米易肉一觔有司供餽悉拒不受廳事惟二
小青衣侍立三司官入揖議事數語而決公庭如水不
聞履聲諸王府總兵官俱相戒不敢犯

再致仕甲辰薦起總理河道陞刑右侍改吏部丁未掌

留堂進南京兵部尚書參贊機務

在南京兵部廉簡鎮靜寡交接雖六卿同列亦罕往返
每拜表聖誕令節赴禮部禮畢了然獨行內外守備議
事外一不他及威望聳然致仕歸七年乙卯地震而卒
年七十七贈太子少保謚恭簡

性好學老不釋卷尤精於律數所著有律呂直解并苑
洛志樂書十卷

其學以精一為宗以培養夜氣為本以修明禮樂為要

旁通天文地理太乙六壬奇門兵陣諸家

公性極孝友事父蓮峰先生及閭巷人終身不違顏色
與弟邦靖同舉進士交相砥礪愛靖切至公疾於廬幾
一載靖侍側未嘗少離飲食必親奉湯藥必分飲鄉人
為立孝弟碑後靖病亟公日慟不解衣不滋味者二月
餘形且瘁靖譬曉之公泣曰吾弟憶東坡詩乎來生之
因尚當同兄弟也及靖卒公廢寢食哭絕哀經蔬食祥
而勿懈樊恕夫曰自有兄弟以來中間道德之高功業

相映亦多矣至相愛之深相信之篤所見之同如公兄弟可謂曠世少有

公門人楊爵楊繼盛並以忠諫顯海內稱二楊先生而椒山傳公樂學

偉矣韓司馬造物鍾竒異讀書探理窟著作人難企生平精樂律書成覆鶴至立朝著偉績居鄉談道義緊有五泉子孝弟稱昆季嗟余生也晚景行竊自愧

馮少墟
關中四

先生
詠

宸濠令一士詐為羽客往說云假以所繪松請題公為
詩曰勁節貞心本自竒四時常見綠猗猗笑他江上桃
花樹為放春光三兩枝士喻意不敢言而退

稗史
彙編

門人白壁曰先生天稟高明學問精到明於數學胸次
灑落大類堯夫而論道體乃獨取橫渠少負氣節既乃
不欲為竒節異行涵養宏深持守堅定則又一薛敬軒
也

黃太冲學案曰某按先生著述其大者為志樂一書方

其始刻之日九鶴飛舞於庭傳其術者為楊椒山手製
十二律管吹之而其聲合今不可得其詳然聲氣之元
在黃鐘之長短空圍而又不能無疑者先生依律呂新
書註中算法黃鐘長九寸空圍九分積八百一十分用
圓田術三分益一得一十二以開方法除之得三分四
厘六毫強為實徑之數不盡二毫八絲四忽以徑求積
自相乘得十一分九厘七毫一絲六忽加入開方不盡
之數得一十二分以管長九十分乘之得一千八十分

為方積之數四分取三為圓積八百一十分蓋蔡季通以管長九寸為九十分故以面積九分乘管得八百一十分其實用九無用十之理凡度長短之言十者皆分九為十以便算也今三吳程路尚以九計可知矣則黃鐘長九寸者八十一分以面積九分乘之黃鐘之積七百二十九分也

揚爵斛山先生忠介公

字伯修富平人

幼貧苦挾冊躬畊為兄所累繫獄上書邑令辭意激烈
令異之曰此奇士也出而加禮

身長七尺美姿容年二十始發篋讀書師事韓恭簡公
講性命之學言動不苟恭簡嘆為畏友

登嘉靖己丑進士官行人考選御史母憂廬墓畢補原
官辛丑上封事謂今日致危亂者五一則輔臣夏言習
為欺國翊國公郭勛為國巨蠹所當急去二則凍餒之
民不憂恤而為方士修雷壇三則大小臣工勿覩朝儀

宜慰其望四則名器濫及緇黃出入大內非制五則言
事諸臣若楊最羅洪先等非死即斥所損國體不小疏
入上大怒逮繫鎮撫司拷掠備至梃鎖晝夜血肉淋漓
死者數矣而先生氣定故得再甦主事周天佐御史浦
鏊俱以救先生筮死獄中於是防守益嚴上日使人偵
先生一言一動皆籍記偵者苦於不得言以情告先生
使勿為善言先生曰有意而言便是欺也部郎錢緒山

德洪劉晴川

魁給事周訥谿

怡

先後以事下獄相與講學

不輟緒山先釋先生願有以為別緒山曰靜中收攝精神勿使遊放則心體湛一高明廣大可馴致矣作聖之功其在此乎先生敬識之與晴川訥谿讀書賦詩如是者五年所著周易辨錄中庸解若干卷乙巳八月上用箕神之言釋先生三人而三人者猶取道潞水舟中講學踰臨清而別會上造觀臺太宰熊決驟諫上怒罷決復遲三人時先生抵家甫十日忽校至先生曰若復來乎校謬為慰曰吾他往一省公耳先生曰吾知之矣與

校同食食已曰行乎校曰盍一入為別先生立屏前曰
朝廷有旨見逮吾行矣即攬袂行又繫獄三年始得還
卒之前一夕有大鳥集於庭先生嘆曰楊伯起之鳥至
矣兆在我乎援筆自誌惓惓以作第一等事做第一等
人教其子孫無他辭隆慶初贈光祿寺少卿謚忠介

斛山論學

天命謂性天人一理也率性謂道動以天也修道謂教
求合乎天也戒懼慎獨自修之功至於中與和也中和

性命本然之則也能致之則動以天矣故其效至於天地位萬物育

夜初靜坐少檢點日間言行因司馬溫公論盡心行己之要自不妄言始夫不妄言所言必皆當理非心有定主豈能至此故輕躁鄙倍及事務瑣屑無益身心而信口談論者皆妄言也因書以自戒

作一好事必要向人稱述使人知之此心不定也不知所作好事乃吾分所當為雖事皆中理纔能免於過惡

耳豈可自以為美才以為美便是矜心禹之不矜不伐
顏淵無伐善無施勞此聖賢切己之學也

與人論事辭氣欠平乃客氣也所論之事雖當於理即
此客氣之動便已流於惡矣可不戒哉

好議論人長短亦學者之大病也若真有為己之心便
惟日不足戒慎乎其所不睹恐懼乎其所不聞時時刻
刻防檢不暇豈暇論人學所以成性而已人有寸長取
為己有於其所短且置勿論輕肆辨折而無疑難涵蓄

之心謂之喪德可也此予之深患不能自克可愧可愧
天下萬變真妄二字可以盡之偏蔽者妄也本體則真
矣學所以去偏蔽之妄全本體之真全則道本性性統
乎天立人之道始無愧矣天地亘古亘今但有此一個
大道理則亘古亘今之聖賢不容更有兩樣學問也

此心易至昏惰須常以聖賢格言輔養之便日有進益
士之處世須振拔特立把持得定方能有為見得義理
必直前為之不為利害所怵不為流俗所惑可也如子

思辭鼎肉孟子却齊王之召剛毅氣象今可想見真可
為獨立不懼者

古人立己甚嚴其責人甚恕今人立己甚恕其責人甚
嚴孜孜為己不求人知方始是學

平生所為得失相半求欲寡過而不可得幽囚坑坎靜
中頗覺自悟始有向學之心然殘損餘息血氣漸減策
勵不前虛生人世與草木同腐矣可愧哉

早起散步園階日升東隅晴空萬里鳶鳥交飛不覺襟

懷開洒萬慮皆空因思曾皙沂水氣象亦是如此

又一邏者告子曰今日好言語上之矣問之乃太甲篇
天作孽語又繼之曰我乃自作孽者故罪至於此子應
之曰吾為言官天下事皆所當言往時一疏上為朝廷
下為蒼生宗廟社稷萬萬年深長之慮豈自作孽者其
人默然

佳按先生氣節高天下皆從學問涵養中來所以能
瀕死不回久而愈厲苟徒恃其血氣之勇其不為百

鍊剛而化統指柔者幾希

大人以治安之時為危亂小人以危亂之時為治安皆
此人也有大人之向慕有小人之向慕有大人之識度
有小人之識度有大人之作用有小人之作用此天地
生物之不齊教化之施固有要而以宇宙間事為己責
者不可不慎也

文章以理為主以氣為輔所論純是一段義理是以理
為主辭氣充盛渾厚不覺軟弱是以氣為輔須胸中正

大不以偏曲邪小之見亂其心又廣讀聖賢格言以充
養之如此則舉筆造語皆是胸中流出其吐辭立論愈
出愈新而無窮也如取之左右逢其源也其騰滙洩蓄
流轉渾厚波瀾汪洋如決江河沛然莫之能禦也其光
燄發揚照耀昭灼如日月中天深谷窮崖之幽花石草
木之微青者自青白者自白仰之以生輝觸之而成色

也
論
文

楊繼盛叔山先生

字仲芳北直容城人嘉靖丁未進士官至兵部員
外郎

七歲喪母父媵妒使之牧從牧所見里塾學而慕之請
受學亦不廢牧十歲餘復喪父家日貧願益攻苦耐飢
寒治經藝遂舉嘉靖庚子鄉試

授南京吏部主事初與考功郎鄭公曉游議論相洽從
韓苑洛先生受樂三月得其數請手製諸樂器諧而合
奏之若一苑洛曰未也吾欲製十二律之管管各備五

音七聲而成一調何如先生退而凝思廢寢食夢大舜
坐于堂上投以金使之擊而謂之曰此黃鐘也覺而汗
恍若悟者製十二管遂成苑洛大悅曰得之矣始吾輯
志樂成而九鶴飛舞庭前其應在此乎併傳其天文地
理皇極太乙壬奇兵陣之學

與吉陽何公遷誨學一遵會約行之吉陽語人曰椒山
之果誠可與進道矣

先生登太山絕頂望雲氣慨天體之不盡益有志於學

遷兵部車駕司員外時咸寧侯仇鸞倡馬市議先生上
疏斥其不可者十辨其說之謬者五詔下錦衣衛逮訊
獄具貶狄道典史地居臨洮山中民不畏法比至翕然
稱神明少暇則進諸生講說文義因買東山超然堂基
立書院祀歷代聖賢名曰道統祠俗尚佛事為設諭禁
革諸生日益衆無所得食迺鬻乘馬及張夫人服裝買
民地二百畝令諸生父兄入粟給筆札又引洮河水溉
地地益饒教養並舉羌人日興起於學又開煤山以給

薪卻巡方之責褐吏民愛之呼楊父


未幾鷹敗罪至族上思其言半載間四遷至兵部武選
司員外先生遂論少師嚴嵩十罪五奸下鎮撫司打問
先生具對侃侃至斷指出脛不易辭詔予杖百坐詐傳
親王令旨絞

先生將受杖或遺之蚺蛇膽却不受曰椒山自有膽何
必蚺蛇哉或又謂勿怕笑應曰豈有打怕楊椒山者
先生臨刑出所著年譜授子應箕曰後十年可開也復

賦詩曰浩氣還太虛丹心照萬古生前未了事留與後人補又曰天王自聖明制度高千古生平未報恩留作忠魂補

先生篤於倫理初會試下第當入太學有負笈費其兄患之乘先生出而強夫人以八石穀廢箸姑聽之及游太學再試居首多得館穀歸其夫人在家亦治農有秋先生始為酒名姻族奉兄觴請復共爨又以公車三十金助兄納粟得散官曰吾道近可徒也隆慶初卹贈太

常寺少卿謚忠愍賜祠額曰旌忠所著有遺集年譜傳
於世



明儒言行錄卷四